




卷二

人事志

世界潮流日益轉變自經濟侵略政策日熾而實業不發達之國家將日陷於絕境錦西民風樸厚而農工商業不見發展是以民力窮困譬若富家之子有田而不知耕反日歎生計之艱窘豈不重可惜乎有地方之責者似宜極力倡興實業以裕民生民既富矣施化方易然此不獨錦西一隅之地爲然也我國以物產豐富之邦作他人市易之場利權外溢倘不早思挽救之策是如以血氣虧竭之人而望其不日暨於病且死也不可得矣可不懼哉作人事志



人事

種族

縣境於三代時已劃入九州之域是食毛踐土於斯地者當以漢族爲多其
後屢被外夷侵據而種類始繁欽定滿洲源流考載百濟之境西北自今廣
寧錦義南跨海蓋東南極朝鮮之黃海忠清全羅諸道故北史謂百濟其人
兼有新羅高麗倭等亦有中國人其祇曰亦有中國人是明其數之不多也
天下郡國利病書載錦州在隋唐時其地空虛至遼乃以所俘漢民居之號
錦州臨海軍中節度生殖日繁清初編土著人爲漢軍八旗與滿洲蒙古各
八旗并稱其遷入之各省漢人另編民籍此外來自西域之回民數亦不少

故境內種族可分漢滿蒙回四種茲分列於後以覘民族之消長焉

漢族

漢族即蒙古利亞族黃色種人初起黃河流域三代時已入本境其後歷經變遷人口仍繁殖清世祖入關撥內地各省人民來此開墾聖祖時直豫魯晉之人尙源源而來投旗者爲漢軍未投旗者另編民籍三百年來生齒日繁今竟居全境人數十分之七八原籍山東最多直隸次之山西河南又次之多以農工爲業有醇樸之遺風遙清末葉厲行新政受潮流之鼓盪而讀書求學者始多復以交通之便利時代之需要營什一之利者尤屬不尠而士農商工燦然俱備矣

滿族

滿族即通古斯族周之肅慎秦漢之東胡晉之鮮卑唐之渤海宋之女真皆此族也明時女真分三種曰海西女真曰建州女真曰野人女真清太祖努爾哈赤崛起建州統一諸部國號滿洲及太宗改國號曰清遂以滿洲爲部族之稱當時滿洲旗兵駐防各處聚族而居是爲滿人亦稱旗人本境滿人絕少惟漢軍旗尙多十一朝東華錄云順治四年三月己巳諭戶部前令漢人投充滿洲者誠恐貧窮小民失其生理困於飢寒流爲盜賊故諭願投充滿洲以資糊口者聽近聞漢人不論貧富相率投充甚至投充滿洲之後橫行鄉里抗拒官府云云是當時之漢軍旗尙隱然自別於漢人自改革後此風遂熄

蒙族

蒙古族即韃靼族唐時有蒙兀室韋爲此族之起源蒙古即蒙兀之音轉也元太祖成吉思汗崛起漠北兵力直達歐洲疆域之廣爲亘古所未有元滅其後裔散居漠南北即今之內外蒙古清初蒙古內附有投旗編入冊檔者曰蒙古八旗駐防各處本境蒙人絕少即間有之亦駸駸乎與漢人同化矣


回族

回族即阿剌伯人初回教祖穆罕默德創回回教建大食國其勢力由土耳其中亞細亞漸及天山南路一帶隋唐時已入中國蔓延四方所至輒相親善守其教旨尤篤在滿洲者爲東干派本土耳其人或曰清高宗時將軍岳鍾琪征

青海隨大軍入境散居各省縣境回民多於清乾隆時由義縣移徙而來居於本城及各鎮多以屠牛羊爲業及一切小本負販尤以飯館營業爲最夥無習農工商者

甯邊台驛站

本境西沿柳條邊東南有連山高橋等驛站明清時所設也故有邊台人專司挑壕拴邊又有驛站人專司傳遞公文此兩種人傳係清初三藩定後其降卒撥歸守邊及驛站之役在前清時代限制極嚴凡邊台驛站之人不得參與考試亦不得爲文武官吏清亡此制遂廢



戶口

縣境於設治以前隸屬錦縣即明之左屯衛地明清之交軍事迭興城郭邱墟人民寥落明之戶口已無稽矣清定鼎後設官招民順治十年定遼東開墾例招民至百名者文授知縣武授守備六十名以上者文授州同州判武授千總五十名以上者文授縣丞武授百總招民數多者每百名加一級所招之民每名給月糧一斗每地一晌給種六升每百名給牛二十隻獎資既優召集斯易康熙元年錦州改爲縣於時戶無舊籍丁鮮原額招徠日增漸臻繁盛七年始行編審法丁賦著於籍錦州府屬實在行差人丁統共八千六百九十（錦府舊志祇載總數）雍正十二年錦縣三十六社原額新增實在行差人丁九千

六百六十四乾隆六年新編民戶一萬一千六百四十九男婦共七萬二千八百七十三（此後十年一編審）十六年編審民戶一萬三千九百八十七男婦共八萬六千零四十七二十六年編審民戶一萬七千四百三十男婦共十三萬三千六百一十二三十六年編審民戶一萬九千一百五十男婦十三萬九千一百七十六四十六年編審民戶一萬九千九百二十九男婦十六萬四千四百零四歲見增加蕃衍益庶迨咸同以降志乘無正確之統計其數乃無可考光緒三十二年本境設治始劃錦縣之西部歸錦西管轄據錦西鄉土誌載（光緒三十三年屬稿）有戶二萬七千八百七十九男女共十四萬零七百四十四是爲由錦縣劃分之數迄今二十年間滋生日繁現有戶三萬七千

三百二十一男女共二十萬零一千五百六十七較之設治時已增至三分之一矣茲將各區戶數男女名口數分列於左

第一區 所轄十六村（城廂在內）

戶數 四千七百七十四

名口數 男一萬三千二百八十四
女一萬一千四百八十九

第二區 所轄十九村

戶數 四千二百二十一

名口數 男一萬三千四百五十一
女一萬二千二百八十三

第三區 所轄十九村

戶數

四千二百三十三

名數

男一萬一千四百三十八
女九千五百八十六

第四區

所轄十七村

戶數

四千一百零八

名數

男一萬一千一百四十四
女九千五百七十四

第五區

所轄二十村

戶數

四千八百一十四

名數

男一萬一千八百六十
女九千七百九十三

第六區

所轄二十五村

戶數 四千八百一十六

名數 男一萬六千六百五十三
口數 女一萬五千一百四十七

第七區 所轄十八村

戶數 五千零零三

名數 男一萬六千六百三十三
口數 女一萬零九百四十五

第八區 所轄十九村

戶數 五千三百五十二

名數 男一萬五千零零五
口數 女一萬三千二百八十二

總計一百五十三村三萬七千三百二十一戶男十萬零九千四百八十六名

女九萬二千零九十九口共二十萬零一千五百六十七人

氏族

佟氏 遼東望族明末鎮國將軍佟達禮之裔清初入漢軍旗以武功顯如兩

廣總督佟養甲因李成棟之變爲國死難追封太子太保兵部尚書弟養貴

戰死於楚之岳游擊大年以罵吳逆死於楚之衡佐領世功亦戰死於秦之

關山征葛爾旦之役元國舅忠勇公佟國綱受命貳師躬冒矢石中弩殞命

餘如陽和總督養量浙閩總督養和巡撫國器鎮國將軍養直江西巡撫國

禎均有戰功而一等公佟國維內大臣隆科多等尤以文名噪一時少保都

統定南將軍盛年（滿諱圖賚）之女爲清世祖妃誕育聖祖（康熙）追封孝

康章皇后而聖祖元妃孝懿仁皇后又爲國舅領侍衛內大臣佟國維之女

遜清一代中公四人國舅三人伯三人額駙二人總督三人巡撫七人其餘
文則內自主事侍郎至公卿大夫外自州縣府道至提刑按察等使武自都
統佐領至提督總鎮不下二百餘人盛極一時其子若孫籍本邑者世居城
東南影壁山烏朝屯連山半拉甸子興隆屯等村

張氏 明孝宗張皇后父巒封昌國公兄鶴齡延齡長封壽寧侯次封建昌伯
居直隸興濟縣嘉靖二十五年遷永和村即今城北十里之安昌峴村其後
裔猶誦讀相承清時有茂才數人云

郭氏 太原郡周毓叔之後或曰見於經之郭公因以爲氏原籍山東清初移
入本境郭氏之顯者城東南劉台子村郭剛道光丙戌武進士官御前侍衛